

110 年全國語文競賽客家語朗讀文章高中學生組（四縣腔）

編號 8 號

【漚雨】張美容原作

恁久來，逐暗晡个落雨聲，總係像躁光¹个細人仔，在佢半睡半醒个夢中，噉噉嘶嘶²、串上串下，無一夜有好恬靜恬靜睡目。想起頭擺人聽著雨打芭蕉个聲音，心肝肚就愁愁慮慮，佢這下還聽著水打在水篷³頂，叮叮咚咚、淅淅錫錫个聲音，吵到人日夜煩躁、食睡毋安，比較起來，佢還係較羨慕古人。

夜夜落雨就算也，連日時頭天一光擘開目珠，就看著滿天个烏烏暗暗，聽著个本本係博人惱个水聲，心情跔等就慍悴起來。在這又溼又冷个天時出門上班、讀書，一路塞車，為著赴時間，大家就少忒耐心，「叭！叭！叭！」个喇叭聲響無停，弄上弄下⁴个奧多拜，危危險險，一下無細義，還會分路過个車仔洩到一身泥漿水。天時毋好，心情跔等毋好，大家完全失忒好天時个平靜摺忍讓。

雨漚無停，佢心肚盡痛个係原本屋前、屋後開到鬧鬧⁵、靚靚

个玫瑰、海棠、櫻花，分水涿到涿涿跌⁶，實在還打爽！毋過，最難為个還係婦人家，因為漚雨，衫晾到無位仔好晾，一屋溼溼涿涿，拚掃也毋方便，細人仔日日關在屋下，拐就拐毋核⁷，實在辛苦。老人家本來在冷天時做得出去晒啊日頭、打下嘴鼓，這下因為漚雨，僅可坐在屋下啄目睡，也當毋慣。盡得人畏个還係菜錢，青菜因為漚水綿忒，動啊著就起幾下倍，水果也係貴參參仔⁸，買毋落手。生理人也怨怪，冷颼颼个落雨天，打狗就毋出門，生理難做啊！逐儕就想：「這雨到底愛漚到幾時，好停哩！」

有一日，本本係落雨天，佢擎等遮仔、跑等頸筋出門，看一眼滿地个落花，心情就像這天時恁毋好。無想著火車經過莊下時，一片青溜溜个田，餵著佢个眼光，蒔落去無幾久个秧仔，隻隻精神百倍，臥等頭享受雨水个滋潤，一陣風吹來，個個在水中歡喜跳等芭蕾。看著這光景，佢正分醒⁹，天下事總有兩面，有利就有弊、有得就有失、有圓就有缺，毋好總係用自家个立場來看萬事萬物。

「漚雨漚到人就會生菇囉！」儕儕堵著就恁樣喊。毋過，佢這下學會轉換佢个心情，利用漚雨清閒个時節，靜下心來，放慢腳步，用音樂、書本摺咖啡、清茶來配合雨水个節奏，也學會打開心胸，接受落花變做春泥護花个多情、還學會欣賞落雨天種種个詩情畫意。

¹ 躁光：音 cau gongˊ；活潑好動。

² 噉噉嘶嘶：音 veˋ veˋ seˊ seˊ；大聲嘶喊。

³ 水篷：音 suiˋ pungˋ；遮雨的棚子。

⁴ 弄上弄下：音 nung songˊ nung haˊ；鑽上鑽下。

⁵ 開到鬧鬧：音 koiˊ do nau nau；開得很繽紛的樣子。

⁶ 涿涿跌：音 dab dab diedˋ；紛紛掉落。

⁷ 拐毋核：音 guaiˋ mˋ hed；拐騙不住。

⁸ 貴參參仔：音 gui semˊ semˊ eˋ；昂貴的樣子。

⁹ 分醒：音 funˋ xiangˋ；清醒。